

Date – 11/10/2025

Time - 18:30 -18:40Hrs

AKASHVANI AIZAWL
REGIONAL NEWS BULLETIN

HEADLINES (EVENING)

1. Rampum huapa Rashtriya Poshan Maah hman mekah tukin khan Aizawl ah chaw nu leh naupang chaw tha pek pawimawh mipa te hnena zirtirna leh thu tiamna hun hman a ni.
2. Mizoramah nikum aiin kumin hian ruahtui a thla hnem zawk.
3. Prime Minister Narendra Modia chuan vawiin khan agriculture kaihhnawih hmasawna leh scheme hrang hrang cheng vaibelchhe sing 4 leh sang 2 hu New Delhi atangin a hawng
4. External Affairs minister Dr.S.Jaishankar leh India-a US palai Sergio Gor te chuan chan vawiin khan New Delhi-ah India leh US inkar thil pawimawh hrang hrang an sawidun ni.

<><><>

POSHAN MAAH

Rampum huapa Rashtriya Poshan Maah (National Nutrition Month) hman mekah tukin khan Women & Child Development Department hnuaia Aizawl District Programme Officer, CDPO Aizawl Urban ICDS Project leh Mizoram Cycling Association-te tangho chuan men-streaming programme pualin Cycle Rally an buatsaih a; Vanapa Hall kawt atangin Aizawl DPO Pi Lalrammawii Kawilam chuan rally-a tlan turte hi vailiamin, Thuampaia AMC Office thleng an tlan a ni.

Kan corr report lo ngaithla ang.

VC

Rashtriya Poshan Maah -Men-Streaming Programme pual hian mipate zirtirna leh thutiam sawirualna hun hman a ni a; department aiawhte kaihhruaina hnuaiah chhungkaw enkawl kawnga pa leh mipate mawhphurhna te, hriselna tura ei leh in tha pawimawhna te, naupang thanlenna kawnga pa berin hma a hruai a pawimawhziате inzirtir a nih bakah, nupui fanaute hrisel tura enkawl kawnga chhungkaw pa mawhphurhna te, chhungkaw nuam leh chhungkaw hlim siam tura pa ber pawimawhzia te, taksa tana hrisel lo ei lo tur leh lei lo tura intiamnate an sawirual bawk.

<><><>

MZP & MIMA

Mizo Zirlai Pawl (MZP) leh Mizoram Merchant Association (MIMA) tangkawp chuan nimin Zirtawpni khan Lammuala First International Star Expo-ah hnamdang rawn sumdawngte an endik a; Inner Line Permit nei lo leh thi tawh mi 36 manin thuneitute kutah an hlan.

MZP leh MIMA chuan thuchhuah intawm siamin, Mizoram chhung ngeiah hnamdangte’n hetiang sumdawnna an rawn kal pui hi tha an ti lo tih an tarlang a; he Expo a hnamdang rawn sumdawng zingah Mizo pakhatin mi 20 chuang a sponsor thei leh a sponsor tu ZORUN EVENTS neitu Laldingngheti Pautu, Lunglei chuan a sponsor mi 20 chuangte ngaihtuah zui miah loa sumdawnna a kalpui chu hriatthiam har an tih thu an tarlang a ni.

An thuchhuah intawmah hian MZP leh MIMA chuan ‘The Mizoram Gazette Notification Guidelines for the Enforcement of the Inner line Regulation in Mizoram-ah Chiang takin ILP hi mi pakhat in 10 aia tam a sponsor theih loh thu a in ziaak tih an tarlang a; ILP pekchhuah kawngah fimkhur leh zual turin thuneitute an ngen bakah, Mizoram-ah hetiang sumdawng thei lo hnam dangte inthuralpuia sumdawnna kalpui hi awm tawh lo se an duh thu an tarlang bawk.

<><><>

JAIL

Mizorama jail 10-ah táng mi 1,904 an awm mek a, jail tangte hi mipa 1,666 leh hmeichhia 222 bakah an nute tàn vanga jail-a awm ve naupang 16 an ni.

Prison department-in October ni 9, Ningani thlenga Mizorama jail hrang hrang - Central Jail, Central Womens Jail leh District Jail 9 dinhmun a tarlan danin, jail tang mipa 1,666 zinga 55 hi damchhung tang tura hrem an ni a; hrehawm taka tang tura hrem 345, tan pangngaia tang tura hrem 240 leh an chungthu ngaihtuah mek 1,026 an awm.

Hmeichhe jail tang 222 zingah hian damchhung tang tura hrem an awm lo a, hetihlai hian hrehawm taka tang tura hrem 36 awmin, tan pangngaia tang tura hrem 17 leh an chungthu ngaihtuah mek 169 an awm bawk.

Dan bawhchhiat vanga jail-a tangte bakah hian an nute tàn vanga jail-a awm ve naupang 16 an awm a; heng naupangte hi Central Womens Jail-ah 9 awmin an tam ber a, Lunglei leh Kolasib district jail-ah 1 ve ve awmin, Champhai district jail-ah 3 leh Serchhip district jail-ah 2 an awm a ni.

(Voice Cast)

(Mizoramah hian jail 11 a awm a, Saitual Dsitric Jail-ah tang an awm lo a; a bak jail dang 10-ah naupang chhiar tel lohin tang 1,888 an awm mek. Tang awmna jail 10 hi mi 1,428 tan theihna tura ruahman nimahse, tunah hian mi 1,888 an tang mek a, jail tang mek zat hi tang thei tur zat ruahman aiin 460-in an tam a ni.)

<><><>

WEATHER FORECAST

Kumin January thla atanga September thla inkar khan Mizoram chuan ruahtui a dawng tha a, district hrang hrang zingah Kolasib chuan ruahtui hi dawng tha berin Mizoram pumah nikum aiin kuminah ruahtui a tam zawk.

Akashvani Aizawl zawhna chhangin Indian Meterological Department, Aizawl Director Pu Sudheer Kumar Dwivedi chuan, Kolasib dawtah hian Aizawl leh Siah district te chuan ruah tui an dawng tha niin a sawi a, nikum aiin ruahtui an dawng tha zawk a ni. Khaw awm dan thlir chuan tun thla October leh November thla lai hawl thleng hian ruahtui a la tlak belh nual turah an ngai bawk.

Byte : IMD Director

IMD Aizawl Director sawi danin District tinah nikum aiin ruahtui an dawng tha zawk vek a. Hetihlai hian ruahtui avang hian lei min leh chhiatna dang pawh a thlen phah ve thin bawk a ni.

Pu Sudheer Kumar Dwivedi chuan ruahtui tlak chungchang leh khaw chin mipui hnena puan chhuah chungchangah All India Radio chuan mawhphurhna pawimawh tak a la nia sawiin, mipui himna leh thu pawimawh tak tak hriattirtu a ni tih a sawi bawk.



BANA KAIH

Mizoram sorkar flagship programme, Bana Kaih (Handholding) Scheme Phase-I hnuaia loan component diltu zinga progress partner atana thlan mi 200 hnenah bank-ten loan an pe tawh a, mi 200 hnena loan pek tawh hi a vaiin cheng vbc 14.39 a tling.

Handholding Scheme Phase-I ah hian loan component dilna 11,439 zinga 702 pawm niin, progress partner atan thlan an ni a; kar kalta October ni 10, Zirtawpni thleng khan he'ng mi 702 zinga mi 200 hnenah hian Handholding Scheme partner bank - Mizoram Rural Bank, Mizoram Cooperative Apex Bank leh State Bank of India-ten loan cheng vbc 14, nuai 39, sing 7 leh 600 an pe tawh.

Handholding Scheme partner bank pathum zinga loan pe tam ber Mizoram Rural Bank chuan mi 151 hnenah loan an pe tawh a; State Bank of India-in mi 40 leh Mizoram Cooperative Apex Bank-in mi 9 hnenah an pe tawh a ni.

Mizoram State Policy Coordination Committee (MSPCC) hotute hnen atanga Akashvani thudawn danin, thlahlui September ni 19-a tlangzarh Handholding Scheme Phase-II kalpui mekah ni 22 chhung, kar kaltla Ningani thleng khan progress partner dilna 20,050 a lut tawh.

Ni 22 chhunga Handholding Scheme Phase-II atana progress partner dilna hi loan component-ah 109 leh CM Special Package-ah 19,941 a ni a; MSPCC hotute chuan phase-II a dilna lut zingah pawm an la neih rih loh thu sawiin, dilna lutte hi an endik chhoh mek thu an sawi a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan vawiin khan agriculture kaihhnawih hmasawna leh scheme hrang hrang cheng vaibelchhe sing 4 leh sang 2 hu New Delhi atangin a hawng. Indian Agriculatural Research Institute buatsaih hawna inkhawmah hian Pu Modia chuan agriculture sector-a sawrkar hmalakna lian tak pahnih PM Dhan Dhaanya Krishi Yojana leh Mission for Aatmanirbhara in Pulses a hawng bawk a.Heng hmalakna pahnihahte hian avaiin cheng vaibelchhe sing 3 sing 5 hman a ni ang. Thusawiin PM Modia chuan PM Dhan Dhaanya Krishi Yojana leh Mission for Aatmanirbhara in Pulses te chu ramchhunga loneitu maktaduai chuangte nun a thlak danglam dawn a ni a ti.

(Byte)

PM Dhan Dhaanya Krishi Yojana ah hian cheng vaibelchhe sing 2 leh sang 4 chuang ruahman a ni a. Loneitute thlai thar tihpun te, tum khata thlai chi hrang tam zawk chin theihna tura hmalakna leh loneih dan tlo zawk kalpuina tur a ni a. Self Reliance in Pulses Mission hi be lam chi a intodelhna tur hmalakna niin cheng vaibelchhe sing 1 leh sang 1 ruahman a ni bawk.

<><><>

EAM

External Affairs minister Dr.S,Jaishankar leh India-a US palai Sergio Gor te chuan chan vawiin khan New Delhi-ah India leh US inkar thil pawimawh hrang hrang an sawidun. Pu Jaishankar-a chuan social media-a a thudahah US Ambassador thar chu a mawhphurhna lak turah duhsakna a hlan thu a sawi bawk a ni.

Pu Gor a hian Foreign Secretary Vikram Misri a kawm bawk a. India-US Comprehensive Global Strategic Partnership leh an ngaih pawimawh thil pawimawh tak tak an sawidun a ni.

<><><>